



Na osnovu člana 2.9 stav (1) tačka 2. Izbornog zakona Bosne i Hercegovine ("Službeni glasnik BiH", broj: 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24) Centralna izborna komisija BiH je na 20. sjednici, održanoj 03.05.2024. godine, donijela

U P U T S T V O

O POSTUPKU OTVARANJA I KORIŠTENJA POSEBNOG RAČUNA ZA FINANSIRANJE TROŠKOVA IZBORNE KAMPANJE

Član 1.

(Predmet)

Uputstvom o postupku otvaranja i korištenja posebnog računa za finansiranje troškova izborne kampanje (u daljem tekstu: Uputstvo) propisuje se postupak otvaranja, zatvaranja i izvještavanja o prometu posebnog računa, koji će političke stranke, koalicije političkih stranaka, nezavisni kandidati i liste nezavisnih kandidata, koji učestvuju na izborima za organe vlasti Bosne i Hercegovine na svim nivoima vlasti, namjenski koristiti za finansiranje troškova izborne kampanje.

Član 2.

(Poseban račun za finansiranje troškova izborne kampanje političke stranke i nezavisnog kandidata)

- (1) Politička stranka i nezavisni kandidat koji učestvuju na izborima za organe vlasti Bosne i Hercegovine na svim nivoima vlasti, dužni su otvoriti poseban račun za finansiranje troškova izborne kampanje.
- (2) Račun za finansiranje izborne kampanje otvara centrala, odnosno glavni odbor političke stranke putem ovlaštenog lica političke stranke.
- (3) Poseban račun za finansiranje izborne kampanje nezavisnog kandidata otvara nezavisni kandidat.
- (4) Poseban račun za finansiranje troškova izborne kampanje, politička stranka i nezavisni kandidat dužni su otvoriti najkasnije s danom podnošenja prijave za ovjeru za učešće na izborima, a najranije ga mogu otvoriti tri mjeseca prije dana podnošenja prijave za ovjeru za učešće na izborima.
- (5) Sredstva koja politička stranka i nezavisni kandidat koji učestvuju na izborima za organe vlasti Bosne i Hercegovine na svim nivoima namjeravaju utrošiti za izbornu kampanju moraju biti unaprijed uplaćena na poseban račun za finansiranje izborne kampanje.

- (6) Na poseban račun za finansiranje izborne kampanje ne smiju se primati druge uplate, osim onih namijenjenih za finansiranje izborne kampanje, niti se sredstva sa tog računa smiju koristiti za bilo koju drugu svrhu, osim podmirenja troškova izborne kampanje.
- (7) Ukoliko nakon uplate svih transakcija, u skladu sa ovim Uputstvom, na posebnom računu za finansiranje izborne kampanje političke stranke preostanu neutrošena sredstva, ona se uplaćuju na transakcioni račun centrale političke stranke.
- (8) Ukoliko sredstva na posebnom računu za finansiranje izborne kampanje nisu dovoljna za izmirenje troškova, politička stranka je obavezna neizmirene obaveze po osnovu troškova izborne kampanje platiti sa računa centrale političke stranke.
- (9) Ukoliko nakon završetka svih transakcija, u skladu sa ovim Uputstvom, na posebnom računu za finansiranje izborne kampanje nezavisnog kandidata preostanu neutrošena sredstva, ona se vraćaju svim izvorima ili donatorima. Povrat preostalih sredstava je srazmjern iznosima uplata ili datih donacija.

Član 3.

(Poseban račun za finansiranje troškova izborne kampanje koalicije političkih stranaka)

- (1) Kada dvije ili više političkih stranaka nastupaju u okviru koalicije, za troškove kampanje mogu koristiti poseban račun za finansiranje troškova izborne kampanje jedne od političkih stranaka, članica koalicije, što se uređuje međusobnim sporazumom političkih stranaka koji se dostavlja i deponira u Centralnoj izbornoj komisiji Bosne i Hercegovine. Sredstva koja je pojedina politička stranka obavezna uplatiti na poseban račun za finansiranje troškova izborne kampanje u skladu sa zaključenim međusobnim sporazumom ne smatraju se donacijom ni prihodom političke stranke koja je otvorila poseban račun za finansiranje izborne kampanje.
- (2) Politička stranka, članica koalicije, može drugoj političkoj stranci u koaliciji dati pozajmicu za finansiranje izborne kampanje na osnovu međusobnog sporazuma, uplatom na poseban račun za finansiranje izborne kampanje. Pozajmica koju je politička stranka na osnovu međusobnog sporazuma dala drugoj političkoj stranci, te povrat pozajmice na centralni račun političke stranke koja je dala pozajmicu, ne smatra se donacijom.
- (3) Sporazum o pozajmici, sa jasno definiranim rokom povrata pozajmice, mora biti ovjeren kod nadležnog organa.
- (4) Sporazum o pozajmici, koji je ovjeren kod nadležnog organa obavezno se dostavlja Centralnoj izbornoj komisiji Bosne i Hercegovine.

Član 4.

(Poseban račun za finansiranje troškova izborne kampanje liste nezavisnih kandidata)

Kada dva ili više kandidata nastupaju u okviru liste nezavisnih kandidata, za troškove kampanje mogu koristiti poseban račun za finansiranje troškova izborne kampanje jednog od kandidata sa liste, što se uređuje međusobnim sporazumom kandidata koji se dostavlja i deponira u Centralnoj izbornoj komisiji Bosne i Hercegovine. Sredstva koja je pojedini kandidat političke stranke obavezan uplatiti na poseban račun za finansiranje troškova izborne kampanje u skladu

sa zaključenim međusobnim sporazumom, ne smatraju se donacijom ni prihodom kandidata koji je otvorio poseban račun za finansiranje izborne kampanje.

Član 5.

(Prijava prometa posebnog računa za finansiranje troškova izborne kampanje)

- (1) Politička stranka i nezavisni kandidat koji učestvuju na izborima za organe vlasti Bosne i Hercegovine na svim nivoima dužni su u vrijeme podnošenja prijave za ovjeru za učestvovanje na izborima Centralnoj izbornoj komisiji Bosne i Hercegovine podnijeti izvještaj (izvod ili analitičku karticu banke) o prometu posebnog računa za finansiranje troškova izborne kampanje za period od njegovog otvaranja do dana podnošenja prijave za ovjeru za izbore.
- (2) Prijava za učestvovanje na izborima političke stranke i nezavisnog kandidata neće biti ovjerena ukoliko politička stranka i nezavisni kandidat ne podnese izvještaj o prometu posebnog računa za finansiranje troškova izborne kampanje iz stava (1) ovog člana.
- (3) Politička stranka i nezavisni kandidat koji učestvuju na izborima za organe vlasti Bosne i Hercegovine na svim nivoima dužni su tri dana prije dana održavanja izbora, podnijeti izvještaj o prometu posebnog računa za finansiranje troškova izborne kampanje, koji sadrži sljedeće podatke: podatke o izvorima novčanih i nenovčanih donacija, podatke o svim troškovima (rashodima) izborne kampanje, kao i računima dobavljača i izvršilaca usluga.
- (4) Politička stranka i nezavisni kandidat koji učestvuje na izborima za organe vlasti Bosne i Hercegovine na svim nivoima, dužni su prilikom podnošenja finansijskog izvještaja za razdoblje od dana podnošenja prijave za ovjeru do dana potvrđivanja rezultata izbora, podnijeti i izvještaj o prometu posebnog računa za finansiranje troškova izborne kampanje.
- (5) Način podnošenja izvještaja iz stava (3) i (4) uređen je Pravilnikom o predizbornim i postizbornim finansijskim izvještajima političkih stranaka i Pravilnikom o predizbornim i postizbornim finansijskim izvještajima nezavisnih kandidata.

Član 6.

(Gašenje posebnog računa za finansiranje troškova izborne kampanje)

- (1) Politička stranka i nezavisni kandidat dužni su ugasiti poseban račun za finansiranje troškova izborne kampanje u roku od tri dana od dana povrata takse ili dijela takse uplaćene za ovjeru za učešće na izborima, u skladu sa Odlukom Centralne izborne komisije Bosne i Hercegovine.
- (2) Ukoliko politička stranka i nezavisni kandidat nisu osvojili mandate i nisu ostvarili pravo na povrat takse ili dijela takse uplaćene za ovjeru za učešće na izborima, poseban račun za finansiranje troškova izborne kampanje dužni su zatvoriti u roku od 15 dana od dana objave rezultata izbora u Službenom glasniku Bosne i Hercegovine.
- (3) Politička stranka i nezavisni kandidat koji učestvuju na izborima za organe vlasti Bosne i Hercegovine na svim nivoima dužni su u pisanoj formi obavijestiti Centralnu izbornu komisiju BiH o zatvaranju posebnog računa u roku od 15 dana od dana zatvaranja računa.

Član 7.

(Prestanak primjene)

Danom stupanja na snagu ovog Uputstva, prestaje da važi Uputstvo o postupku otvaranja i korištenja posebnog računa za finansiranje troškova izborne kampanje („Službeni glasnik BiH“, broj 5/22 i 27/22).

Član 8.

(Stupanje na snagu i objava)

Ovo Uputstvo stupa na snagu danom donošenja, a objavit će se u „Službenom glasniku BiH“, „Službenim novinama Federacije BiH“, „Službenom glasniku RS“, „Službenom glasniku Brčko distrikta BiH“ i na internet-stranici Centralne izborne komisije Bosne i Hercegovine.

Broj: 05-02-2-587-1/24
Sarajevo, 03. 05. 2024. godine



Predsjednica
Dr. Jovana Hadžiabdić